



Պարույր Սևակ

Գիշերն ու ես

Գիշերն ունի ամե՛ն բանի թույլտրվություն:

Իսկ ես չունե՞մ:

...Ու ջնջում եմ

Էլեկտրական լամպագրրի այն խորհուրդը,

Թե «Շահավետ, հուսատու է փողը պահել դրամարկղում»

(Փող ունենամ՝

Կհասկանամ

Առանց և այդ լամպագրրի)...

...Ու բացում եմ

Փակ դռները գիշերային խանութների.

Ընդամենը հարկավոր է ծխելու բան,

Որ կուզեի ինձ վաճառեր

Ա՛յն աղջիկը,

Որի աչքերն ունեն ինչ-որ անորոշ գույն,

Որի անունն անհայտ է ինձ,

Որի սիրտը փակ է իմ դեմ՝

Ինչպես խանութն այս լեփլեցում,

Եվ ի՞նչ ճաշակ ունի արդյոք,

Ես չգիտեմ,

Բայց կուզեի,

Շա՛տ կուզեի,

Որ նա սիրել կարողանար
Նաև... տգեղ տղամարդու...
Գիշերն ունի ամեն՝ն բանի թույլտվություն:
Իսկ ես չունե՞մ:
...Եվ ասում եմ ա՛յն խոսքերը,
Որ երբևէ չէի կարող ասել կյանքում...
...Բաց եմ անում
Եվ արգելված - հայհոյական բառերն ամեն՝
Իրենց թաքուն պոեզիայով,
Որ կուտակվել է դարեդար...
... Ներս եմ մտնում ա՛յն դռներից,
Որ միշտ փակ են եղել իմ դեմ
Ու միշտ բաց են նրա՛նց առաջ,
Որոնց եղածն ու չեղածը ես լա՛վ գիտեմ,
Բայց չեմ ասի նաև այսօր,
Այսօ՛ր,
Երբ ես կարծես ունեմ թույլտվություն...
...Ներս եմ մտնում
Եվ խոսքերիս ա՛յն իրավունքն եմ ես տալիս,
Որ կհնն ունի՝
Երբ այդ կինը
Ոչ թե արդեն էլ չի սիրում իր ամուսնուն,
Այլև շա՛տ լավ է հասկացել,
Թե չի սիրում ինչի՛ համար:
Ա՛յն կինը, որ գիտի մի բան
Եվ չգիտե նրա մի բան.
Նա չգիտի,
Որ աշխարհում
Կարելի է ապրել նաև առանց սիրո,
Եվ լա՛վ գիտի,

Որ երբևէ,

Ի՛նչ էլ լինի ու չլինի՝

Անկարող է դավաճանել...

Գիշերն ունի ամե՛ն բանի թույլտրվություն:

Իսկ ես չունե՛մ...

26.V.1959թ. 14.X.1959թ.

Մոսկվա Չանախչի